

D'r Sjaopebok

D'r pap hauw mit de kirmes 't Frenske al vermijd¹ bie d'r boer Moulen. Hae waor mit Sint Remeys² begoos en wirkde noe al 'ne maond op de boerderiej. Hae verzörgde 't kleinviè, wie de hinne, verke en ouch de sjäöp. Op 'nne goowe daag, 't Frenske waor in 't sjtaokes³ mit d'r brietselkul⁴ 't verkesvoor aan 't kleinmake, wie d'r baas langsleep en vroeg of alles in orde waor. Jao zag 't Frenske, allein dat sjaop lik d'r ganse mörrige te blaere, mèh 't haet genog voor en water gehad.

Doe mos mèr mit 'm nao d'r bok gaon, da gaet dat geblaer waal euver. Doe wèts toch wo ze eine bok hōbbe? Dat weit ich zeke, waor zien antwoord. Dus wie 't Frenske alles gedaon hauw, doog hae 't sjaop e zeil um d'r haus en góng op waeg nao d'r bok.

Hae wis waal neet wo d'r bok woonde, mèh d'r pap houw gezag dat hae neet ummer mos vraoge wo get waor, want dan dagte de luj dat hae dóm waor. Wie 't Frenske ónger i g'n dörp kaom zoote dao 'n paar ouw mennekes boete op de bank de piep te sjwame en op de vraog van 't Frenske of zie wiste wo d'r bok woonde, zag eine lachentaere: " Jóng, hiej 't drijde hoes aan d'r linksekant, dao woont d'r Bok."

't Frenske klopde dao aan en vroeg aan dae man dae aoep deeg of hae d'r bok waor en dat d'r baas Moulen häöm gesjik hauw mit 't sjaop um dat deer van 't blaere aaf te helpe.

't Frenske zoog neet dat dae man, dae zich Bok sjreef, vuurroad woort va gief en zich mós inhoute um häöm geine optater te verkoupe.

D'r Bok bedach zich neet lang, want hae zoog dat die twiè ouw rotzek op de bank zich kapot aan 't lache waore, trok 't Frenske en 't sjaop mit nao d'r plêj op en zag:

"Zet dat sjaop dao mèr in dae sjtal en bing 't deer achter aan dae haok in de moer vas."

Wie 't Frenske in dae sjtikduustere sjtal zich bögkde um nao dae haok te zeuke, goof d'r Bok häöm 'nne sjtamp ónger de vot, dat hae mit d'r kop taegde de moer vloog. Hae goof 'ne bröl en d'r Bok zag:

" Bis mèr veurzichtig ,..... hat d'r bok dich al gestoate"?

¹ dienstbetrekking aangaan bij de boer

² St. Remigius 1 oktober

³ ruimte voor het koken van varkensvoer

⁴ Stok met aan onderkant een verdikking om gekookte aardappelen en brandnetels etc. klein te maken tot varkensvoer.

Ongerwiel 't Frenske op de bank veur d'r sjtal biekaom van d'r sjrik, plekde d'r man 't sjaop mit get plekband de moel toe en zag nao 'n minuut of tièn : "Zoa jóng, gank mèr nao d'r baas Moule en zèk dem, dat es hae d'r Bok wilt bezeike, hae toch get vreuger op mot staon, en dat hae zelf mós koome afraekene."

't Frenske begreep d'r nieks van en vertelde d'r baas heim wie alles geloupe waor. D'r baas drièjde zich um en barsjde 't oet van 't lache.

'n Hauf oer later góng hae op d'r fiets nao d'r Bok um 't gebeurde reg te zètte.

Aangekome bie d'r Bok kós hae zich neet miè inhauwe van d'r lach en iè hae vertelt hauw dat 't 'n vergissing van d'r kneg waor, sloog d'r Bok häöm 'nne slaag op zien gezich dat 't blood oet d'r lup sjpadde en hae sjrièwde va gief:

"Noe hils doe ouch dien moel en zuls doe in 't vervolg waal baeter oetkieke es doe zoa'ne häörejuèk d'r waeg op sjiks."

D'r Moulen sjpróng op d'r fiets en waor binne e paar minuute weer heim. 't Frenske zoog dat blood en de dieke lup van d'r baas en zag : "Hat d'r bok uch ouch gestoate?"

D'r Moulen koos zich neet miè inhauwte en reep: "Doe uulskuke, maak das doe wegkums! dat bis doe sjuld, doe wets nog neet 't versjil tössje d'r Bock en 'nne sjaopebok.

't Frenske wis neet wat 'm uèverkaom, sjnäärde nao de vriej in, zat zich op de haverkis en zag:

"D'r Moule kan mich e maasch lekke, 't is ouch noats good wat ich doon."

Dré Kickken